

懷寧縣志卷之一

知懷寧縣事 齊東王毓芳纂輯
署上海趙梅

沿革

自班孟堅作漢地理志以郡統縣嗣是分併損益屢代各殊或地是而名改或名在而地非不知今之所隸與古異同則山川之域人物之產皆不可得而晰也安慶於漢廬江郡地得十之四懷又安慶之一隅耳然桐侵舒潛占霍懷奄潛而羸桐則欲得懷古與今之名實必合桐潛考之欲得桐潛古與今之名實又必合舒霍考之因併及太湖宿松望江焉志沿革

懷寧縣志

卷之一

沿革

一

安慶在禹貢揚州之域天官斗九度分野周以前國邑遼乎不可識已

春秋時爲舒六縣惟桐潛見於左傳餘約略皆舒地也左傳僖三年徐人取舒杜注舒國今廬江舒縣文十二年羣舒叛楚杜注舒偃姓舒庸舒鳩之屬今廬江南有舒城舒城西南有龍舒宣八年楚人滅舒蓼杜注舒蓼二國名春秋釋例蓼安豐蓼縣成十七年楚人滅舒庸杜不言其地但云東夷國據傳舒庸道吳人圍巢當卽今和州含山縣以含山在巢縣東六十里在無爲州東北百二十里在太平府西北六十里無爲州與巢縣皆春秋時巢國而太平爲吳地舒庸

在其間故能導吳圍巢也襄二十四年舒鳩人叛楚
楚子師於荒浦二十五年楚屈建帥師滅舒鳩杜亦
不言其地但云舒鳩楚屬國荒捕舒鳩地今按吳有
鳩茲楚子重伐吳克鳩茲卽今蕪湖則舒鳩當在無
爲州巢縣間矣孔疏引世本有舒鮑舒龔他書未見
戰國屬楚

秦屬九江郡

楚義帝時爲衡山王國

姚氏鼐曰項羽分王諸將封九江王黥布都六封衡
山王吳芮都邾秦之九江郡分爲二衡山卽今霍山
非湖南之衡山也秦始皇帝二十八年渡淮水之衡

懷寧縣志

卷之二

沿革

二

山南郡浮江亦此霍山芮爲衡山王約有今安慶廬
州黃州地

漢屬廬江郡治舒領縣十二

舒居巢龍舒臨湖雩婁襄安樅陽尋陽灄皖湖陵邑
松茲今安慶約有龍舒樅陽尋陽皖湖陵邑五縣地
漢滅楚徙衡山王吳芮爲長沙王而以黥布爲淮南
王都六九江衡山廬江豫章郡皆屬焉廬江之名始
見於此高帝十一年布反國滅立子長爲淮南王王
黥布故地凡四郡都壽春徐廣曰四郡九江衡山廬
江豫章也文帝六年淮南王長謀反徙蜀嚴道死十
六年復封其三子阜陵侯安爲淮南王安陽侯勃爲

衡山王陽周侯賜爲廬江王皆得厲王時地三分之
孝景三年吳楚七國反吳使者至廬江廬江王弗應
而往來使越吳使者至衡山衡山王堅守無二心孝
景四年吳楚已破衡山王朝上以爲貞信乃勞苦之
曰南方卑濕徙衡山王王濟北以褒之廬江王邊越
數使使與越相交徙爲衡山王王江北廬江國除爲
郡元狩元年衡山王賜謀反國除爲衡山郡

漢志廬江郡下云故淮南文帝十六年別爲國廬
江出陵陽東南北入江六安國下云故楚高帝元
年別爲衡山國五年屬淮南文帝十六年復爲衡
山武帝元狩二年別爲六安國領縣五今按高帝

懷寧縣志

卷之一

沿革

三

本立四郡九江廬汪衡山豫章以王黥布布滅立
子長爲淮南王王布故地孝文十六年三分其地
以王厲王三子安淮南勃衡山賜廬江三郡各有
所屬惟豫章不知屬於何國據廬江王邊越使使
與越相交吳楚滅乃徙衡山王江北廬江郡不邊
越邊越者豫章也則廬江王殆治豫章矣蓋古廬
江原在江南以太江望廬山而名班氏諸侯王表
北界淮瀕畧衡廬爲淮南師古注衡廬二山名是
衡山廬江皆以山表國也廬江在《山海經》爲柴桑
山柴桑縣漢屬豫章郡今江西德化縣南有柴桑
故城班志廬江郡下云廬江出陵陽東南北入江

則廬江卽彭蠡也陵陽縣漢屬丹陽郡今青陽有陵陽廢縣石埭有陵陽山彭蠡發源徽之率由其下流委輸至德化北接於潯陽江故曰出陵陽東南北入江九江郡下應劭注云江自廬江尋陽分而爲九是亦以廬江在尋陽土也淮南王安欲起兵西嚮伍被言南收衡山以擊廬江有尋陽之船守下雉之城結九江之口絕豫章之浦以禁南郡之下今下雉故城在湖廣興國州與德化接壤若使爾時廬江王王廬江郡在江北但有尋陽一縣耳卽克之何遽能守下雉而絕豫章也惟廬江在江南故廬江王與越交通惟廬江王王江南故徙

懷寧縣志

卷之一

沿革

四

衡山乃王江北此可以地形推驗而得也或曰廬江王治豫章而廬江郡又屬廬江王則淮南四郡五十縣淮南王得十五衡山王得五廬江王以季子而得三十旣曰三分固若是其不均乎曰班氏於廬江郡言故淮南文帝十六年別爲國於六安國言故楚高帝元年別爲衡山國武帝元狩二年別爲六安國凡言別者或就國別爲郡或就郡別爲國其所轄不得盡如原郡國所轄矣惟衡山郡別爲六安國故六安止五縣餘縣以分隸諸郡而衡山郡省今可知者衡山王吳芮都邾則邾爲衡山地矣伍被言南收衡山守下雉之城則下雉亦

當爲衡山地矣而漢皆屬江夏是其證也竊嘗論豫章郡之德化彭澤鄱陽柴桑等縣當爲廬江國地而廬江郡之全爲廬江王國則未敢知也若以地形參互求之衡山即霍山以山表國廬江郡之潯皖雩婁等縣皆占有霍山或當爲衡山國地郡別爲國安知此數縣不在廬江所別之外乎故茲於安慶但繫廬江郡不繫廬江國云

東漢屬廬江郡治舒樅陽湖陵邑省

三國吳屬廬江郡治皖尋陽縣屬武昌郡

建安十九年曹操遣朱光爲廬江太守屯皖大開稻田呂蒙曰皖地肥美若一收熟彼衆必增於是攻皖

懷寧縣志

卷之一

沿革

五

破之權即以蒙爲廬江太守治皖自此遂爲重鎮曹氏廬江郡則在合肥以北治陽泉今霍邱縣西九十里有陽泉城漢六安國屬縣也正始中文欽爲廬江太守移治六安吳擊魏廬江滿寵曰權舍舟二百里縣軍深入恐其走不及耳時治六安也

建安二十五年權自公安都鄂改名武昌以尋陽縣屬武昌郡後又立蘄春郡以尋陽屬蘄春

晉自武帝至成帝時廬江郡治陽泉

初仍魏舊治六安後併吳廬江乃移治陽泉也

武帝太康元年省蘄春郡以尋陽縣屬武昌一年還屬廬江郡惠帝永興元年分廬江之尋陽武昌之柴

桑二縣置尋陽郡屬江州成帝時又於尋陽僑置松滋郡

安帝時立晉熙郡

安帝義熙中分廬江之南部立晉熙郡並立懷寧令懷寧之名始見於此

尋陽縣省入柴桑縣松滋郡省爲松滋縣並屬尋陽郡

劉宋晉熙郡治懷寧

松滋縣屬尋陽郡

宋志晉熙郡領縣五懷寧新治陰安南樓太湖左縣文帝元嘉二十五年以豫部蠻民立太湖呂亭二縣

懷寧縣志

卷之一

沿革

六

晉熙後省明帝太始二年復立

是時廬江郡惟有舒潛二縣陰安呂亭皆今桐城則舒不得復占桐矣潛爲今之霍山雖與皖壤地不無羸雜要安慶所轄無幾故以後不復繫廬江

南齊晉熙郡治新治

呂亭左縣屬廬江郡尋陽郡惟有柴桑彭澤二縣松滋當是省入柴桑也

梁至陳晉熙郡治懷寧

梁武帝太清末鄱陽王範以晉熙郡爲晉州高齊天保六年蕭軌克晉熙郡以爲江州陳宣帝太建五年伐齊平固侯陳敬泰等克晉州城復爲晉州州改而

郡如故隋志懷寧下云舊置晉熙郡開皇初郡廢是也

隋志同安縣下云舊曰樅陽并置樅郡不言置自何時南畿志謂梁改呂亭左縣爲之宿松縣下云梁置高塘郡望江縣下云陳置大雷郡是時安慶一府分隸四郡惟懷寧太湖屬晉熙耳

隋開皇初改晉熙郡爲熙州大業三年置同安郡治懷寧

隋志同安郡統縣五懷寧宿松太湖望江同安其樅陽高唐大雷等郡併省

唐爲舒州同安郡至德二載更名盛唐郡後復故統縣

懷寧縣志

卷之一

沿革

七

五懷寧宿松望江太湖桐城

元志安慶路唐初爲東安州又改舒州又改同安郡又復爲舒州按唐志諸道皆州郡連言改同安郡爲盛唐郡則然矣改舒州爲同安郡似非也其誤始於元和郡縣志謂武德四年改同安郡爲舒州天寶元年仍爲同安郡乾元元年復爲舒州無改盛唐郡一事而東安州則又唐書所未載者不知元史何据也

五代時爲舒州屬吳徐温代吳屬南唐

中和四年舒州陷於羣賊廬州刺史楊行密遣兵擊定之光啟二年滁州刺史許勅襲取舒州景福二年

楊行密復取之周顯德五年世宗親征南唐唐主李景盡獻淮南諸州舒州在焉

宋初爲舒州同安郡

熙寧八年置同安監鑄銅錢

徽宗政和五年賜額曰德慶軍高宗紹興十七年改安慶軍慶元元年以寧宗潛邸升爲府領縣五懷寧桐城宿松望江太湖

元爲安慶路領縣六懷寧宿松望江太湖桐城潛山潛山至治三年初立

明初改寧江府尋復爲安慶府屬南直隸領縣六懷寧桐城潛山太湖宿松望江

懷寧縣志

卷之二

沿革

八

國朝府縣仍舊順治二年改南直隸爲江南省

懷寧在兩漢爲皖地

皖一作皖地不見於春秋左傳漢始置縣通典諸書謂春秋時卽有皖國偃姓咎繇之後云出史記今檢史記無此語或又云周大夫出封皖伯亦不知所出今按爾雅霍山爲南嶽郭璞謂卽潛之天柱山天柱卽今皖山疑皖霍聲轉矣古聲之轉與此類者如大雅以按徂旅孟子作遏按遏轉也左傳董安于韓非子說儲作闕安闕轉也考工記刮摩之工故書作琒琒刮轉也地理志沛郡鄆縣本作鄆音嵯鄆鄆轉也昌黎言韓與何同姓爲近

韓何轉也今皖山卽霍山則縣之得名可知矣漢武帝登禮潛之天柱南嶽古者山川之祀皆有神主之五岳視三公唐虞八伯主四岳山曰皖公台曰皖伯殆由此乎必求其人以實之鑿矣舊志於春秋時預以舒皖並列今改歸漢時漢之皖卽今之潛亦兼得懷寧地

三國爲吳皖城地屬廬江郡

東晉成帝時爲懷寧縣屬晉熙郡宋齊梁陳同

太康志有皖米志無之自立懷寧而皖省矣

隋爲懷寧縣開皇初改晉熙郡爲熙州屬熙州大業三年改熙州爲同安郡屬同安郡

懷寧縣志

卷之二

沿革

九

唐爲懷寧縣屬舒州同安郡武德五年析置皖城安樂

梅城皖陽四縣旋省以後皆爲懷寧縣

宋初屬舒州同安郡後同安郡升德慶軍改安慶軍升安慶府至今縣屬之如故桐城太湖宿松望江並同

懷之名立於晉自晉至宋凡史言懷寧其治皆在今潛山宋端平三年移治羅剎洲又移楊槎洲嘉定十年黃幹知安慶府又移盛唐灣乃今治也

桐城春秋時爲桐國

左傳定二年桐叛楚杜注舒縣有桐鄉卽古桐國按漢朱邑爲桐鄉嗇夫今其墓在桐城縣西二十里則春秋之桐卽今之桐城地也

漢爲龍舒及樅陽縣

左傳杜注舒城西南有龍舒今廬江縣西百二十里有龍舒故城羅泌路史國名紀謂龍舒以大小龍山而名曰龍以別羣舒則龍舒當是今桐城也

樅陽在今桐城縣東南百二十里臨江武帝紀元封五年南巡守自尋陽浮江射蛟江中獲之舳艫千里薄樅陽而出作盛唐樅陽之歌是也

東漢爲龍舒侯國及舒縣地屬廬江郡

永平初封許昌爲龍舒侯樅陽蓋省人龍舒矣范志舒下云有桐鄉

晉爲龍舒及舒縣地屬廬江郡

懷寧縣志

卷之二

沿革

十

太康志有龍舒沈約宋志無之蓋東晉末廢也

劉宋爲陰安縣及呂亭左縣地屬晉熙郡

方輿紀要陰安城在桐城縣東南八十里本漢魏郡屬縣劉宋時僑置於此

宋文帝元嘉二十五年以豫部蠻民立呂亭左縣卽今之呂亭驛也在桐城縣北三十里

南齊陰安縣屬晉熙郡呂亭左縣屬廬江郡

梁改呂亭左縣爲樅陽縣並置樅郡北齊及陳同

樅陽自東漢省至梁始復隋志同安縣下云舊樅陽開皇初郡廢不言陰安疑陰安先已省人樅陽矣

隋曰同安縣開皇初改晉熙郡爲熙州屬熙州大業三

年改熙州爲同安郡屬同安郡

唐至德二載更名桐城屬舒州同安郡以後皆爲桐城屬郡與懷寧同

潛山春秋時有潛國得名最先然霍山非潛山也

左傳昭二十七年吳子因楚喪使公子掩餘公子燭庸伐楚圍潛三十一年吳人侵潛六楚沈尹戌帥師救潛吳師還楚師遷潛於南岡今霍山縣東北三十里有故潛城非安慶之潛山縣也

漢爲皖及潛縣地

班志潛下云天柱山在南有祠泚水所出北至壽春入芍陂泚與淠同今淠水在霍山縣東源出霍山

懷寧縣志

卷之一

沿革

十一

漢時潛蓋兼得今潛霍兩縣地兩縣治相距三百六十里界壤不容無孱入也

三國爲吳皖城吳廬江郡治此

建安四年袁術死術從弟允棄壽春奔廬江太守劉勲於皖城是年孫策襲皖城克之六年孫權以皖城太守李術貳於曹操攻屠其城旣而操取其地魏志曹公恐江表郡縣爲權所畧皆令內徙民轉相驚自廬江九江蘄春廣陵戶十餘萬皆東渡江江西遂虛合肥以南唯有皖城建安十九年曹操遣朱光爲廬江太守屯皖大開稻田呂蒙改克之權卽以蒙爲廬江太守治皖自此遂爲重鎮

建安十四年廬江人陳蘭等據潛六以叛曹操遣張遼擊平之吳後屢攻六安不克霍山於時當屬魏也晉爲皖縣屬廬江郡東晉義熙中改皖爲懷寧縣屬晉熙郡皆治此

元至治三年始置潛山縣至今縣名不改

古潛縣乃今霍山自隋開皇初改潛爲霍後但有霍無潛元至治三年始析懷之清朝玉照二鄉置潛山縣明及國朝因之

太湖漢爲湖陵邑及皖地屬廬江郡

班志湖陵邑下云北湖在南方輿紀要劉宋立太湖左縣者以地有太湖也在縣西南縣西諸山溪之水

懷寧縣志

卷之二

沿革

十二

鍾而爲湖東南流經望江縣入於大江今爲平陸姚氏鼎曰湖陵邑蓋得今太湖及望江西地漢志云北湖在南蓋以今望江諸湖對江南之彭蠡湖名北湖耳

東漢爲皖地屬廬江郡湖陵邑蓋省入皖三國至晉同宋元嘉二十五年以豫部蠻民立太湖左縣屬晉熙郡南齊同

元和郡縣志齊建元二年行台左丞廬潛更故太湖城立龍安郡陳太建五年郡廢今按建元高齊無此年號方輿紀要於懷寧梅城云在府北七十里高齊天保三年行台右丞廬潛屯兵築城於此

時龍鳴城內潛以爲不祥移屯在外謂之龍鳴城
唐武德中嘗析懷寧地置梅城縣治此兩事相類
皆正史未載傳聞異辭不足據信龍鳴城內當是
附會潛在壽州青黑龍升天之事有辨見城池

隋開皇初改晉熙縣屬熙州十八年復改名太湖大業
三年改熙州爲同安郡屬同安郡

唐武德四年析置青城荊陽二縣七年省青城入荊陽
八年省荊陽入太湖以後皆爲太湖屬郡與懷寧同
宿松漢爲尋陽縣地屬廬江郡

舊志作松滋姚氏鼐謂漢志松茲蓋得今宿松及
英山南地按方輿紀要霍邱縣東十五里有松茲

懷寧縣志

卷之二

沿革

十三

故城昭帝時封共王子霸爲侯邑又宿松縣北五
十里有松滋廢縣又江西九江府德化縣東有松
滋廢縣是松滋一名而三屬也其實德化宿松之
名松滋乃晉以後僑置之松滋於漢則宿松當爲
尋陽縣地而松茲當在霍邱蓋嘗合漢晉考之前
漢松茲戴侯霸昭帝始元五年封至侯均王莽篡
位絕後漢廬江郡無松茲光武建武十三年省六
安屬廬江松茲當於此時並省據沈約宋志安豐
太守魏文帝分廬江立領縣二有松滋安豐於前
漢爲六安國屬縣松茲之復置隸安豐疑其初省
亦必併入安豐矣何也松滋自國絕至併縣僅三

十餘年自併縣至復置百五十餘年其城池疆域必皆未湮故黃初復置尚仍其舊凡州郡分併亦取壤地相接安豐在今壽州西南六十里去霍邱縣九十里併松茲於安豐不虞地形之遼濶也使其爲今宿松則與安豐隔越不相及矣宋志又云晉成帝初於尋陽僑置松滋郡安帝後省松滋郡爲松滋縣尋陽之松滋言僑置安豐之松滋不言僑置則松滋之本在安豐又審矣所以定宿松於漢當爲尋陽地者班志廬江郡尋陽下云禹貢九江在南皆東合爲大江明縣在九江北也今九江北縣惟宿松及黃梅據晉宋二志吳立蘄春郡尋

懷寧縣志

卷之一

沿革

十四

陽縣屬焉晉武帝太康元年省蘄春郡以尋陽屬武昌二年復屬廬江郡惠帝永興元年分廬江之尋陽武昌之柴桑二縣置尋陽郡成帝初又於尋陽僑置松滋郡安帝義熙八年省尋陽縣入柴桑縣省松滋郡爲松滋縣爲今宿松得名松滋之始則未僑立松滋以前之爲尋陽又審矣黃梅於漢亦當爲尋陽地但漢江夏郡原有蘄春縣晉宋有蘄陽縣隋因於蘄春郡立黃梅縣則黃梅容在蘄春之內不得專尋陽之名也今人以江西德化爲尋陽此在省尋陽入柴桑後則可若兩漢及西晉但當稱柴桑不得稱尋陽也至僑置之松滋蓋兼

得今宿松德化兩縣地故兩縣皆有松滋之名要
不得預以漢之松滋當之

三國爲吳尋陽縣改屬武昌郡又改屬蘄春郡

建安二十五年四月權自公安都鄂改名武昌以武
昌下雉尋陽陽新柴桑沙羨六縣爲武昌郡

宋志吳立蘄春郡尋陽縣屬焉

晉爲尋陽縣後又爲松滋縣

晉武帝太康元年省蘄春郡以尋陽屬武昌二年以
武昌之尋陽復屬廬江郡惠帝永興元年分廬江之
尋陽武昌之柴桑二縣置尋陽郡成帝時又於尋陽
僑置松滋郡安帝義熙八年省尋陽入柴桑後又省

懷寧縣志 卷之一

沿革

十五

松滋郡爲松茲縣

劉宋爲松滋縣屬尋陽郡南齊尋陽郡無松滋當是省
入柴桑其安豐郡之松滋則今霍邱與宿松無涉也

梁爲高唐郡北齊亦爲高唐郡陳因之

唐一作塘

南史大同八年於江州新蔡高塘立頌平屯墾作蠻
田

按高唐梁齊並置在齊曰北高唐梁敬帝太平二
年分尋陽太原齊昌高唐新蔡五郡置西江州是
梁之高唐也陳太建二年吳明徹等伐齊北高唐
郡來降是齊之高唐也宿松在江北時當屬齊

隋爲宿松縣

開皇初廢高塘郡改名高塘縣十八年又改名宿松
唐仍隋曰宿松屬舒州同安郡武德四年以縣置巖州
八年州廢仍屬舒州以後皆曰宿松屬郡與懷寧同
望江漢爲皖縣及湖陵邑地東漢至晉同

縣東三十里有雷池三國時有雷池監孟宗嘗爲雷
池漁官晉置大雷戍

東晉安帝義熙中爲新冶縣屬晉熙郡宋齊因之齊新
冶縣爲晉熙郡治

陳爲大雷郡

永定二年西討王琳衆軍至自大雷三年王琳寇大
雷詔遣大尉侯瑱司空侯安都儀同徐度率衆禦之

懷寧縣志

卷之一

沿革

十六

隋開皇十一年改曰義鄉十八年改名望江屬熙州大
業三年置同安郡屬同安郡

唐爲望江屬舒州同安郡武德四年以縣置高州尋更
名智州七年州廢以望江隸巖州旋復故以後皆爲望
江屬郡與懷寧同